

勅脩陝西通志

第六十三卷

人物九

儒林

文學

陝西通志第六十三卷

人物九

儒林

漢

田何字子莊齊人自孔子授易五傳至何漢興田何以齊諸田徙杜陵號曰杜田生以易受弟子東武王同子仲洛陽周王孫丁寬齊服生等皆顯當世惠帝時何年老家貧守道不仕帝親幸其廬以受業終爲易者宗

高士傳

施讐字長卿沛人從田王孫受易後徙長陵田王孫爲博士復從卒業與孟喜梁邱賀並爲門人及梁邱賀爲少府事多廼遣子臨分將門人張禹等從讐問於是賀薦讐結髮事師數十年賀不能及詔拜爲博士甘露中與五經諸儒雜論同異於石渠閣

漢書本傳

陝西通志

卷六十三

人物九

惠莊長安儒生聞朱雲折五鹿充宗之角乃歎息曰栗犢反能爾耶吾終耻溺死溝中裹糧從雲雲與言莊不能對逡巡而去拊心謂人曰吾口不能劇談而此中多有

西京雜記

韋賢字長孺魯國鄒人爲人質朴篤志於學兼通禮尚書以詩教授號稱大儒徵爲博士給事中進授昭帝詩遷光祿大夫詹事至大鴻臚宣帝即位以先帝師甚見尊重本始三年代蔡義爲丞相封扶陽侯爲相五歲以老病乞骸骨賜黃金百斤加賜第一區丞相致仕自賢始薨諡曰節侯少子元成字少翁少好學修父業以明經擢諫大夫遷大河都尉初元成兄弘爲太常丞職奉宗廟典諸陵邑煩劇多罪過及賢病篤弘竟坐宗廟事繫獄室家問賢當爲後者賢恚恨不肯言門下生與宗家計議矯賢令以元成爲後元成知非賢雅意即陽病狂徵至長安當襲爵以病狂不應召丞相

御史以元成實不病劾奏之詔勿劾引拜元成不得已受爵宣帝高其節以爲河南太守初帝寵淮陽憲王欲以爲嗣久之欲感風憲王輔以禮讓之臣召拜元成爲淮陽中尉詔與蕭望之及五經諸儒雜論同異於石渠閣條奏其對永光中代于定國爲丞相七年守正持重不及父賢而文采過之建昭三年薨諡曰共侯初賢以昭帝時徙平陵元成別徙杜陵病且死乞骸骨歸葬父墓上許焉漢書本傳韋賢治詩事博士大江公及許生又治禮傳子元成元成及兄子賞以詩授哀帝至大司馬車騎將軍由是魯詩有韋氏學漢書儒林傳

張山拊字長賓平陵人事小夏侯建爲博士論石渠至少府授同縣李尋鄭寬中少君山陽張無故子儒信都秦恭延君陳留假倉子驕由是小夏侯有鄭張秦假李氏之學漢書本傳

陝西通志

卷六十三

人物九

二

鄭寬中平陵人有雋才以博士授太子成帝即位賜爵關內侯食邑八百戶遷光祿大夫領尚書事會疾卒谷永上疏曰鄭寬中有顏子之美質包商偃之文學總五經之妙論直師傅之顯位卒然早終宜加葬禮賜之令諡上弔賜甚厚漢書本傳○按漢書載張山拊師事夏侯建授同縣李尋與寬中同師寬中守師法教授尋獨好洪範災異雖其說王鳳以進賢臣諫哀帝以遠外戚議論不無可採但洪水爲災之說不應於前而一聞夏賀良等改元易號增益漏刻之邪言更附和于後卒以左道亂政流徙燉煌身敗名裂班史不列之儒林傳中自有深意今附識於此不欲假托經術者與儒林諸賢同傳也

士孫張字仲方平陵人受易於五鹿充宗爲博士官至給事中家世

傳業

冊府元龜

郭威字文偉茂陵人好讀書以謂爾雅周公所制而爾雅有張仲孝友張仲宣王時人非周公之制明矣嘗以問揚子雲子雲曰孔子門徒游夏之儔所記以解釋六藝者也家君以爲外戚傳稱史佚

教其子以爾雅爾雅小學也又記言孔子教魯哀公學爾雅爾雅之出遠矣舊傳學者皆云周公所記也張仲孝友之類後人所足

耳

西京雜記

蘇竟字伯況平陵人平帝時以明易爲博士講書祭酒善圖緯能通百家之言王莽時拜代郡中尉時匈奴擾亂北邊竟終完輯一郡光武即位就拜代郡太守建武五年詣京師拜侍中以病免初延岑護軍鄧仲况擁兵據南陽陰縣爲寇劉歆兄子龔爲其謀主竟時在南陽與龔書曉之仲况與龔遂降龔字孟公長安人善議論扶風馬援班彪並器重之竟終不伐其功潛樂道術作記誨篇及文章傳於世年七十卒

後漢書本傳

許商長安人善爲算著五行論歷四至九卿號其門人沛唐林子高爲德行平陵吳章偉君爲言語重泉王吉少音爲政事齊炅欽幼

陝西通志

卷六十三

人物九

三

卿爲文學王莽時林吉爲九卿自表上師家大夫博士郎吏爲許氏學者各從門人會車數百兩儒者榮之欽章皆爲博士徒衆尤

盛

漢書本傳

杜林字伯山茂陵人博洽多聞時稱通儒初爲吏王莽敗盜起林與弟成俱客河西隗囂素聞林志節深相敬待以爲侍書林雖拘於囂而終不屈節弟成物故囂聽林持喪東歸旣遣而悔追令刺客楊賢於隴坻遮殺之賢見林身推鹿車載致弟喪賢乃歎曰我雖小人何忍殺義士因亡去光武徵拜侍御史引見問以經書故舊及西州事甚悅之京師大夫咸推其博洽爲光祿勳內奉宿衛外總三署周密敬慎選舉稱平羣臣上言宜增科禁詔下公卿林奏曰人情挫辱則義節之風損法防煩多則苟免之行興臣愚以爲宜如舊制帝從之頃之代朱浮爲大司空博雅多通稱爲任職相明

年薨帝親自送葬除子喬爲郎

後漢書本傳

林從張竦受學於西州得

漆書古文尚書常寶愛之衛宏徐巡皆受林學出示宏曰林流離

兵亂常恐此經將絕何意衛子徐生復能傳之古文雖不合時務

然禮失求之野古文不猶愈於野乎願諸生無悔所學古文遂傳

於世

東觀漢記

賈逵字景伯平陵人父徽從劉歆受左氏春秋兼習國語周官又受古文尚書於塗煇學毛詩於謝曼卿作左氏條例逵傳父業弱冠能誦左氏傳兼通五家穀梁之說自爲兒童常在太學不通人間事身長八尺二寸諸儒爲之語曰問事不休賈長頭性愷悌多智思調儻有大節尤明左氏傳國語爲之解詁上疏獻之顯宗重其書寫藏秘館時有神雀集宮殿官府帝召逵問之對曰昔武王終父之業驚鷺在岐宣帝威懷戎狄神雀仍集此胡降之徵也帝勅

陝西通志

卷六十三

人物九

四

蘭臺給筆札使作神雀頌拜爲郎肅宗立降意儒術好古文尚書左氏傳召逵入講帝善其說使發出左氏傳大義長於二傳者逵條奏曰左氏義深於君父公羊多任於權變帝嘉之令逵自選公羊嚴顏諸生高才者教以左氏和帝即位以逵爲侍中領騎都尉內備幃幄兼領秘書近署甚見信用逵所著經傳義詁及論難百餘萬言學者宗之後世稱爲通儒

後漢書本傳

李育字元春扶風漆人少習公羊春秋沉思專精博覽書傳知名大學深爲同郡班固所重固薦育於東平王蒼由是京師貴戚爭往交之州郡請召育到輒辭病去常避地教授門徒數百涉獵古學嘗讀左氏傳謂不得聖人深意作難左氏義四十一事建初元年衛尉馬廖舉育方正爲議郎後拜博士四年詔與諸儒論五經於白虎觀育以公羊義難賈逵往返皆有理證最爲通儒再遷尚書

令及馬氏廢育坐爲所舉免歸歲餘復徵再遷侍中卒於官

後漢書本

傳

京兆祭酒晉馮結髮修身白首無違好古樂道元默自守古人

美行時俗莫及扶風掾李育經明行著教授百人客居杜陵茅室土階京兆扶風二郡更請徒以家貧數辭病去雖前世名儒韋平孔翟無以加焉京兆督郵郭基孝行著於州里經學稱於師門政務之績有絕異之效

班蘭臺集

楊政字子行京兆人少從范升受梁邱易善說經書京師語曰說經鏗鏘楊子行教授數百人范升嘗爲出婦所告坐繫獄政乃肉袒以箭貫耳抱升子潛伏道旁候車駕持章叩頭曰范升一子今適三歲孤子可哀武騎虎賁舉弓射之不肯去旄頭又以戟義政傷胸猶不退泣請感帝詔出升政由是顯名爲人不拘小節果敢自矜然篤於義時帝壻梁松皇后弟陰就皆請與交友政每言論切

陝西通志

卷六十三

人物九

五

磋懇至不爲屈撓建初中官至左中郎將

後漢書本傳

魯丕字叔陵

恭弟平陵人

性沉深好學兼通五經以魯詩尚書教授爲當

世名儒建初元年舉賢良方正除議郎遷新野令期年州課第一擢拜青州刺史元和元年拜趙相門生就學者常百餘人關東號曰五經復興魯叔陵永元二年遷東郡太守丕在二郡爲人修通灌溉百姓殷富數薦達幽隱名士明年拜陳留太守十三年遷侍中免永初二年詔公卿舉儒術篤學者大將軍鄧騭舉丕復爲侍中左中郎將再爲三老七十五卒於官

後漢書本傳

摯恂字季直伯陵之十二世孫也明禮易遂治五經博通百家之言又善屬文詞論清美扶風馬融沛國桓麟等自遠方至者十餘人旣通古今而性復溫敏不耻下問故學者宗之隱於南山之陰永和中博求名儒公卿薦恂行侔顏閔學擬仲舒文參長卿才同賈

誼由是公車徵之不詣大將軍竇武舉賢良不就清名顯於世以
壽終高士傳

宋登字叔陽長安人父由爲太尉登少傳歐陽尚書教授數千人爲
汝陰令政爲明能號稱神父遷趙相入爲尚書僕射順帝以登明
識禮樂使持節臨太學奏定典律轉拜侍中數上封事抑退權臣
由是出爲潁川太守市無二價道不拾遺病免卒於家汝陰人配
社祠之後漢書本傳

三國

吉茂字叔暢馮翊池陽人世爲著姓好書不耻惡衣惡食而耻一物
之不知建安初關中始平茂與扶風蘇則共入武功南山隱處精
思數歲州舉茂才除臨汾令居官清靜吏民不忍欺之轉爲武德
侯庶子後又爲武陵太守不之官轉鄼相以國省拜議郎黃初中

陝西通志

卷六十三 人物九

六

病亡茂修行從少至長冬則被裘夏則短褐行則步涉食則茨藿
臣役妻子室如懸磬其或饋遺一不肯受雖不以此高人亦心疾
不義而富且貴者三國志常林傳註

董遇字季直性質訥而好學與平中關中擾亂與兄季中依將軍段
熲采梠負販而常挾持經書投閑習讀其兄笑之而遇不改建安
初王綱小設郡舉孝廉稍遷黃門侍郎旦夕侍講爲天子所愛信
轉爲冗散常侍黃初中出爲郡守明帝時入爲侍中大司農數年
病亡初遇善治老子又善左氏傳更爲作朱墨別異人有從學者
遇不皆教而云讀書百遍而義自見從學者言苦無日遇言當以
三餘或問三餘之意遇言冬者歲之餘夜者日之餘陰雨者時之
餘由是諸生少從遇學無傳其朱墨者魏略遇子綏位至秘書監亦
有才學世語

隗禧字子牙京兆人世單家少好學初平中客荊州擔負經書每以探摺餘日則誦習之太祖定荊州詔署軍謀掾黃初中爲譙王郎中王宿聞其儒者虚心從學禧亦敬恭以授王由是大得遺賜以病還拜爲郎中年八十餘以老處家就學者甚多禧旣明經又善星官常仰觀天文歎息謂魚豢曰天下兵戈尚有未息如之何豢又嘗問左氏傳禧答曰欲知幽微莫若易人倫之紀莫若禮多識山川草木之名莫若詩左氏直相斫書耳不足精意也豢因從問詩禧說齊韓魯毛四家義不復執文有如諷誦又撰作諸經解數十萬言未及繕寫而得聾後病亡

三國志王肅傳注

晉

董景道字文博弘農人少而好學千里追師所在惟晝夜讀誦略不與人交通明春秋三傳京氏易馬氏尚書韓詩皆精究大義三禮

陝西通志

卷六十三 人物九

七

之義專遵鄭氏著禮通論非駁諸儒演廣鄭旨永平中知天下將亂隱於商洛山衣木葉食樹果彈琴歌笑以自娛毒蟲猛獸皆繞其傍劉元海及聰屢徵皆礙而不達至劉曜時出山廬於渭汭曜徵爲太子少傅散騎常侍並固辭竟以壽終

晉書本傳○按晉世崇尚虛無廢弛名教

故通經學古之士寥寥無幾其載在儒林者有京兆韋謏字憲道雅好儒學善著述綜羣言秘要嘗著伏林三千餘言演爲典林二十三篇凡所作述皆深博有才義但考其本傳始仕劉曜又仕石勒後又仕冉閔覲顏貪爵歷事三姓而又不能容默自保卒殺身於凶暴之手生平事蹟一無足取所謂名儒而行非者茲不敢徇舊濫入使真儒與僞儒同傳也

北魏

梁祚北地泥陽人父邵爲濟陽太守祚篤志好學歷治諸經尤善公羊春秋鄭氏易常以教授有儒者風與幽州別駕平恒有舊僑居於薊積十餘年雖羈旅窮窘而著述不倦辟秘書中散稍遷秘書令後出爲統萬司馬徵爲散令撰並陳壽三國志名曰國統又作

代都賦頗行於世清貧守素不交勢貴年八十七卒子元有父風

少子重相州鎮北府叅軍事

魏書本傳

徐遵明字子判華陰人幼孤好學隨鄉人毛靈和詣山東求學至上黨乃師屯留王聰受毛詩尚書禮記一年便辭聰詣燕趙師事張吾貴服膺數月乃私謂其友人曰張生名高而義無檢格凡所講說不愜吾心遂與平原田猛略就范陽孫買德受業一年復欲去之猛略謂遵明曰君年少從師每不終業如此用意終恐無成遵明曰吾今始知真師所在猛略曰何在遵明指心曰在此乃詣平原唐遷納之居於蠶舍讀孝經論語毛詩尚書三禮不出門院時彈箏吹笛以自娛又知館陶趙世業家有服氏春秋乃往讀之因撰春秋章義爲三十卷是後教授門徒每臨講坐必持經執疏然後敷陳海內莫不宗仰永安二年爲亂兵所害

魏書本傳

陝西通志

卷六十三 人物九

八

唐

顏師古字籀其先臨沂人祖之推自高齊入周終隋黃門郎遂居關中爲萬年人父思魯以儒學顯武德初爲秦王府記室叅軍師古少博覽精故訓學仁壽中李綱薦之授安養尉高祖入關授朝散大夫累遷中書舍人典典機密詔令一出其手太宗即位拜中書侍郎封瑯琊縣男帝嘗歎五經傳習寢訛詔師古於秘書省考定多所釐正因頒所定書於天下學者賴之俄拜秘書少監專刊正事古篇奇字世所惑者討析申熟必暢本原與譔五禮成進爵爲子又爲太子承乾注漢書遷秘書監弘文館學士從征遼道病卒諡曰戴師古弟相時字睿亦以學聞貞觀中累遷諫議大夫有爭臣風轉禮部侍郎師古死不勝哀而卒師古叔游秦武德初累遷廉州刺史時劉黑闥初平人多強暴游秦至禮讓大行終鄆州刺

史撰漢書決疑師古多資取其義

唐書本傳

蕭德言字文行系出蘭陵陳亡徙關中貞觀時歷著作郎弘文館學士太宗欲知前世得失詔魏徵虞世南褚亮及德言袁次經史百氏帝王所以興衰者上之帝愛其書曰使我稽古臨事而不惑者公等力也賚賜尤渥德言晚節學愈苦開經輒被濯束帶危坐妻子諫曰老人何終日自苦答曰對先聖之言何復憚勞詔以經授晉王王爲太子又兼侍讀請致仕不許進秘書少監以乃得謝高宗立遣通事舍人即家致問乘輿至肅章門引見禮遇隆重卒諡

曰博

唐書本傳

韋叔夏安石兄通禮家學叔父太子詹事琨嘗曰爾能繼漢丞相業矣擢明經第歷太常博士高宗崩卹禮亡缺叔夏與中書舍人賈大隱博士裴守真撰定其制擢春官員外郎武后拜洛享明堂凡

陝西通志

卷六十三

人物九

九

所沿改皆叔夏等裁討每立一議衆咨服之累遷成均司業又詔五禮儀物司禮博士有所修革須叔夏等評處然後以聞進位春官侍郎中宗復位轉太常少卿爲建立廟社使進銀青光祿大夫累封沛郡公卒諡曰文子紹開元時歷集賢修撰遷太常初帝詔歲率公卿迎氣東郊至三時常以孟月讀時令於正寢二十六年詔紹奏月令一篇朔日於宣政側設榻東向置案紹坐讀之諸司官長悉升殿坐聽高宗上元三年將祫享議者以禮緯三年祫五年禘公羊家五年再殷祭二家舛互諸儒莫能決太學博士史元議禘後三年而祫又二年而禘議遂定後至開元二十七年禘祭五祫祭七紹奏四月巳禘孟冬又祫祀禮叢數請以夏禘爲大祭之源自是相循五年再祭後終太子少師

唐書本傳

啖助字叔佐趙州人後徙關中淹該經術天寶末調臨海尉丹陽主

簿善爲春秋考三家短長縫綻漏闕號集傳復攝其綱條爲例統門人趙匡陸質其高弟也助卒質與其子異錄助所爲春秋集註總例請匡損益質纂會之號纂例唐書本傳

韋彤京兆人名治禮德宗時爲太常博士先是天寶中詔尚食朔望進食太廟天子使中人侍祠有司不與也貞元十二年帝詔朔望食畀宗正太常合供彤與裴堪議曰禮宗廟朔望不祭寢園則有之王者弗敢以孝思之極而溢禮弗敢以肴品之多而賸味願罷天寶所增奉寢園以珍奉宗廟以禮帝曰是禮先帝所定今遽更之其謂朕何卒不廢唐書本傳

韋公肅隋觀城公約七世孫萬年人元和初爲太常博士兼修撰憲宗耕籍詔公肅草具儀典太子太傅判太常卿事鄭餘慶言廟有二祖妣疑於祔祭請諸有司公肅議古諸侯一娶九女故廟無二嫡

陝西通志

卷六十三 人物九

十

自秦以來有再娶前娶後繼皆嫡也兩祔無嫌諸儒不能異初睿宗祥月太常奏朔望弛朝尚食進蔬具止樂後遂爲常公肅上言禮忌日不樂而無忌月王者不以私懷踰禮故禪禮徙月樂漸去其情也不容追遠而立禮反重今太常雖郊廟樂且停習是謂反重以慢神也有司禁中外作樂是無故而徹也願依經誼裁正其違詔禮官學官議咸曰宜如公肅所請制可以壽卒唐書本傳

韋表微字子明萬年人羈州能屬文擢進士第爲翰林學士時李紳忤宰相貶端州龐嚴蔣防皆謫去學士缺人爭薦丞相所善者表微獨薦韋處厚人服其公進知制誥後與處厚議增選學士復薦路隋處厚以諸父事表微因曰隋位崇入且翁右奈何答曰選德進賢初不計私也文宗立進戶部侍郎升志沼叛詔李聽率師討之天子憂無成功表微曰以聽軍勢不十五日必破賊及捷書上

止浹日以病痼罷學士卒始被病醫藥不能具所居堂寢隘陋既沒弔客咨嗟篤故舊雖庸下與攜手語笑無間尤好春秋病諸儒是非紛然著三傳總例完會經趣又以學者薄師道不如聲樂賤工能尊其師著九經師授譜

唐書本傳

柳璞字韜玉華原人學不營仕著春秋三氏異同義又述天祚長曆斷自漢武帝紀元爲編年以大政大祥異侵叛戰伐隨著之閏位者附見其左常謂杜征南春秋後序述紀里曆爲得實自餘史家皆差蔣係以爲然終著作郎

唐書本傳

張載字子厚長安人少喜談兵至欲結客取洮西之地年二十一以書謁范仲淹一見知其遠器乃警之曰儒者自有名教可樂何事於兵因勸讀中庸載讀其書猶以爲未足又訪諸釋老累年究極

其說知無所得反而求之六經嘗坐虎皮講易京師聽從者甚衆一夕二程至與論易次日語人曰比見二程深明易道吾所弗及汝輩可師之撤坐輟講與二程語道學之要渙然自信曰吾道自足何事旁求於是盡棄異學淳如也舉進士爲邠州司法叅軍雲巖令政事以敦本善俗爲先每月吉具酒食召鄉人高年會縣庭親爲勸酬使人知養老事長之義因問民疾苦及告所以訓戒子弟之意熙寧初御史中丞呂公著言其有古學神宗方一新百度思得才哲士謀之召見問治道對曰爲政不法三代者終苟道也帝悅以爲崇文院校書他日見王安石安石問以新政載曰公與人爲善則人以善歸公如教玉人琢玉則宜有不受命者矣明州苗振獄起往治之還朝即移疾屏居南山下終日危坐一室左右簡編俯而讀仰而思有得則識之或中夜起坐取燭以書其志道

精思未始須臾息敝衣蔬食與諸生講學每告以知禮成性變化氣質之道學必如聖人而後已以爲知人而不知天求爲賢人而不求爲聖人此秦漢以來學者大蔽也故其學尊禮貴德樂天安命以易爲宗以中庸爲體以孔孟爲法黜恠妄辨鬼神其家昏喪葬祭率用先王之意而傳以今禮又論定井田宅里發斂學校之法皆欲條理成書使可舉而措諸事業會秦鳳帥呂大防薦其學善發明聖人之遺旨其政略可措以復古宜還其舊職以備諮訪乃詔同知太常禮院與有司議禮不合復以疾歸中道疾甚沐浴更衣而寢旦而卒貧無以斂門人共買棺奉其喪還翰林學士許將等言其恬於進取乞加贈卹詔賜館職半賻載學古力行爲關中士人宗師世稱爲橫渠先生淳祐元年封郿伯崇祀孔子廟廷弟戩字天祺起進士知金堂縣養老卹窮召父老使督教子弟民

有小善皆籍紀之月吉召老者飲勞使其子孫侍勸以孝弟民化其德所至訟獄日少熙寧初爲監察御史累章論王安石亂法乞罷條例司及追還常平使者劾曾公亮陳升之趙抃依違不能救正韓絳左右徇縱與爲死黨李定以邪譖竊臺諫且安石擅國輔以絳之詭隨臺臣又用定輩繼續而來芽蘖漸盛呂惠卿刻薄辯給假經術以文奸言豈宜勸講君側書數十上又詣中書爭之安石舉扇掩面而笑戩曰戩之狂直宜爲公笑天下笑公者不少矣趙抃從旁解之戩曰公亦不得爲無罪抃有愧色遂稱病待罪出知公安縣徙監司竹監至舉家不食筭常愛用一卒其卒盜筭籜治之無少貸罪已正待之復如初略不介意其德量如此卒於官

宋史
本傳

呂大鈞字和叔

大防弟
藍田人

中乙科調秦州司理叅軍改知三原縣請代

父賁入蜀移巴西縣賁致仕大鈞亦移疾不行丁外艱家居講道數年起爲諸王宮教授改宣義郎會伐西夏鄜延轉運使檄爲從事旣出塞轉運使李稷餽餉不繼欲還安定取糧使大鈞請於种諤諤曰吾受命將兵安知糧道萬一不繼召稷來與一劍耳大鈞性剛直曰朝廷出師去塞未遠遂斬轉運使無君父乎諤意折始許稷還未幾道得疾卒年五十二大鈞從張載學能守其師說而踐履之居父喪哀麻葬祭一本於禮後乃行於冠昏膳飲慶弔之間節文燦然可觀關中化之尤喜講明井田兵制謂治道必自此始悉撰次爲圖籍可見於用雖皆本於載能自信力行載每歎其勇爲不可及弟大臨字與叔學於程頤與謝良佐游酢楊時在程門號四先生通六經尤邃於禮每欲掇習三代遺文舊制令可行不爲空言以拂世駭俗元祐中爲大學博士遷秘書省正字范祖禹

陝西通志

卷六十三

人物九

三

薦其好學修身如古人可備勸學未及用而卒

宋史本傳

蘇昞字季明武功人素性純茂強學篤志從張載學最久後見二程復師事以卒其業元祐末呂大忠以布衣薦爲太常博士坐元符中上書言事入邪籍編管饒州卒

宋史
簡錄

侯仲良字師聖華陰人二程舅氏無可之孫從二程遊人有欲館之者仲良造焉則壁垂佛像几積佛書其家人又常齋素仲良遂行嘗訪周濂溪濂溪留之對榻夜談越三日乃還自謂有得如見天之廣大伊川驚異其不凡曰非從濂溪來耶後遊荊州胡文定留與爲隣終焉朱文公稱其學清白勁直

關學
編

郭緒字天錫蒲城人幼而岐嶷讀書如素習晚調上杭簿留意邵雍象數之學兼取揚雄所據列山易以章會統元推之久而成書名易春秋爲二十卷隆興紀元以其書上方議推恩而卒

萬姓
統譜

楊天德字君美高陵人肄業太學登進士第釋褐補聊城丞累遷轉運司度支判官京城不守流寓宋魯間十年而歸自讀書至晚歲風節矯矯始終不少變晚讀大學解沿及伊洛諸書大嗜愛之常語人曰吾少時精力奪於課試殊不省有此今而後知吾道之傳爲有在也埋沒篆刻中幾不復見天日目昏不能視書猶使其子講誦而朝夕聽之以是自樂及有疾親友往問之談笑歌詠不衰曰吾晚年幸聞道死無恨矣卒年七十九許衡誌其墓

關學編

楊奐字煥然乾州奉天人年十一母歿哀毀如成人金末舉進士不第作萬言策指陳時病未及上而歸教授鄉里東平嚴實聞奐名數問其行藏奐終不一詣太宗詔宣德稅課使劉用之試諸道進

陝西通志

卷六十三

人物九

十四

士奐試東平兩中賦論第一耶律楚材薦授河南路徵收稅課所長官兼廉訪使既至招致名士與之議政事約束以簡易爲事按行境內親問監務月課幾何難易若何有以增額言者奐曰剝下欺上汝欲我爲之耶即減原額四之一公私便之不踰月政成時論翕然以爲前此漕司未有也在官十年請老於燕之行臺壬子世祖在潛邸驛召奐叅議京兆宣撫司事上書請歸卒年七十奐博覽強記作文務去陳言以蹈襲爲耻朝廷諸老皆折行輩與之交關中號稱多士名未有出奐右者奐不治生產業而喜周人之急雖力不贍猶勉強爲之人有片善則委曲稱獎惟恐其名不聞或小過失必盡言勸止不計其怨怒

元史本傳

蕭軒字維斗奉元人性至孝出爲府史上官語不合即引退讀書南山者三十年於是博極羣書天文地理律曆算數靡不研究及門

受業者甚衆世祖分藩在秦辟軒侍秦邸軒以疾辭授陝西儒學
提舉不赴後累授國子司業改集賢侍讀學士皆不赴大德十一
年拜太子右諭德扶病至京師入覲東宮書酒誥爲獻以朝廷時
尚酒故也尋以病力請去職卒諡貞敏軒制行甚高真履實踐教
人必自小學始爲文辭立意精深言近指遠以洙泗爲本濂洛考
亭爲據關輔之士翕然宗之稱爲醇儒

元史本傳

岳崧號景山邵陽人延祐中三聘不起解禽鳥語嘗讀書於卧虎崗

與蕭軒友善所著有六經四書註

賈志

同恕字寬甫奉元人恕安靜端凝羈州如成人日記數千言年十三
以書經魁鄉校至元間三召不起陝西行臺御史趙世延請即奉
元置魯齋書院中書奏恕領敎事制可之先後來學者殆千數延
祐六年以奉議大夫太子左贊善召入見東宮賜酒慰問繼而獻

陝西通志

卷六十三

人物九

五

書歷陳古誼盡開悟涵養之道明年春英宗繼統以疾歸恕之學
由程朱上溯孔孟務浚源理以利於行敎人曲爲開導使得趨
向之正性整潔平居雖大暑不去冠帶母張夫人卒事異母如事
所生父喪哀毀致目疾時祀齋肅詳至嘗曰養生有不備事猶可
復追遠有不誠是誣神也可這罪乎恕家居十三年摺紳望之如
景星麟鳳鄉里稱爲先生而不姓至順二年卒年七十八制贈翰
林直學士諡文貞其所著曰集菴集二十卷

元史本傳

第五居仁字士安

涇陽人見
關學編

幼師蕭軒弱冠從同恕受學博通經史

躬率子弟致力農畝而學徒滿門其弘度雅量能容人所不能容
嘗行田間遇有竊其桑者居仁輒避之鄉里高其行義率多化服
作字必楷整遊其門者學明行修卒之日門人相與議易名之禮
私諡曰靜安先生

元史同
恕傳

韓擇字從善奉元人天資超異信道不惑其教學者雖中歲以後亦必使自小學等書始或疑爲陵節勤苦擇曰人不知學白首童心且童蒙所當知而皓首不知可乎擇尤邃禮學有質問者口講指畫無倦容士大夫游宦過秦中必往見擇莫不虛往而實歸焉世祖嘗詔之赴京疾不果行其卒也門人爲服緦麻者百餘人

元史蕭軒傳

侯均字伯仁奉元人父母早亡獨與繼母居賣薪以給奉養積學四十年羣經百氏無不淹貫每讀書必熟誦乃已嘗言人讀書不至千徧終於已無益故其答諸生所問窮索極深如取諸篋笥名震關中學者宗之用薦者起爲太常博士後以上書忤時相意不待報可即歸休田里均貌魁梧而氣剛正人多嚴憚之及其應接之際則和易欵洽雖方言古語人所未曉者莫不隨問而答世咸服

陝西通志

卷六十三

人物九

夫

其博聞

元史蕭軒傳

程瑁字君用涇陽人隱居不仕弱冠即以古學自力討論六籍寒暑未嘗少輟三原李子敬創學古書院延瑁講學其中遠近從遊者百餘人循循然樂道不倦學者稱悅古先生嘗戒諸子曰人性本善習之易荒古聖賢皆以驕情爲戒况凡民乎集家戒一卷以遺

子孫

關學編

明

尚士行同州人名志以字行學通五經元末隱居白水之龍崗山學者稱南崗先生與蒲城趙孟暘馬巨江等樂道講學明初孟暘爲學士薦於朝詔授本學訓導以斯文爲已任士皆翕然慶得師焉同州馬巨江蒲城人洪武十七年以通經舉授咸寧訓導永樂初授翰林五經博士時稱鉅儒趙晉字孟暘亦蒲城人明太祖徵聘